

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqqutit imaattut saqqummiuppakka:

E-learningimik Danmarkimi ilinniarusuttut periarfissaqalernissaat anguniarlugu Naalakkersuisut ilinniagaqarnersiuteqarsinnaanermut ammaassinissamut pilersaaruteqarpat?

(Doris Jakobsen, Siumut)

Tungavilersuut:

E-learning Danmarkimi ilinniarfinni assigiingitsuni periarfissaalernikuuvoq, tassa imaappoq qaffasissumik ilinniartoqarsinnaalernikuuvoq ilinniagassat angerlarsimaffimmi sulinerulluunniit saniatigut ingerlanneqarsinnaallutik.

Assersuutigalugu, E-learningimik University College Sjællandimi ilinniartitsisunngorniartarneq tamakkiisuvoq (fuldtidsstudie).

<http://ucsj.dk/uddannelser/laerer/uddannelsen-som-e-laering/>

Ilinniarneq ilinniarnertut allatulli qaffasissuseqarpoq sapaatip akunneranut 37 tiimi ukiumillu sisamanik sivilissuseqarluni. Soorlu aamma naliginnaasumik ilinniartitsisunngorniartarneq taamaattoq, aaqqissuussaanerali uani kisimi allaaneruneruvoq. Ilinniarneq naammassigaanni allatuulli professionsbacheloritut angusiffiusarpoq, ilinniartitsisutullu sulilernissamut periarfissaqalertarluni.

E-learningimik ilinniarneq Danmarkimi periarfissaalernikuuvoq, suliffillit, ilaqtallit, ungasissumiluunniit ilinniartut nunani allaniittulluunniit periarfissinniarlugit.

Taamatut ilinniartitaaneq SU-mik tassa ilinniagaqarnersiutinik pissarsiffiusarpoq, ajorluartumilli nunatsinneersut tassunga periarfissamut mattusimaneqarput qinnuteqartullu tamarmik itigartinneqartarlutik tamannagooq nunatsinneersunut inatsisitigut periarfissaqanngimmat. Tamanna assut ajuusaarnarpoq uggornarlunilu.

Ajornartorsiut pillugu Danmarkimi Kalaallit Illuini ilinnialertussanut siunnersuisartunut oqaloqatiginnissutiginikuuara, taakkualu assut aamma iluaagaat taamatut inissisimasoqarnera. Uppernarsarpaat qinnuteqartoqartarsimagaluartoq ajoraluartumilli itigartitsisarsimallutik nunatsinniit periarfissaqartitsinnginnerput pissutigalugu.

Taamaammat Naalakkersuisunit paaserusuppara, ajornartorsiut tamanna iluarsineqarsinnaannginnersoq pisariaqartikkatsigit nunatsinni ilinniarsimasut kikkulluunniit.